

den Molberg vnd strasse vnter dem Judenberge ingeslossen des Fyemans huse an das Kirniczsch thor, von demselbin thore vffhyn in den statgraben vnd wegen biß an das wethererucze vor dem Lomaczschen thore biß an die stat. Item sie mogen vnd sollen auch gerichte haben vff der Elbebrucken zwischen beiden thoren. Was aber von vngeschichte von der brucken in die Elbe qweme, was auch vngerichtetes in dem flisse des wassers der Trebische geschce, das behalten wir vns vnd vnser herschafft daruber zurichten, alles vnschedlich an der losung, die wir vnser erben vnd erbnemen an denselben zweien teiln des gerichtes haben an geuerde. Vnd das in kunfftigen zczeiten vnser amptlute daselbst zu Missen vnd die burgere in einche zewitracht ader vnwillen geineinander der gerichte halben icht durffen komen, haben wir aber durch zeitigen rat vnser rete vnd lieben getruwen den drittenteil des gerichtes doselbst zcu Missen, oberste vnd niderste mit sinen zugehorungen, als das an vns vnd vnser herschafft von den edeln ern Heinrichen dem eldern von Plauwen seligen vnd ern Heinrichen sinem sone mitsampt dem burggrauenthum komen ist, nichtet vßgeslossen den vilgnanten burgermeistern reten vnd gemeinde vnser offtgenanten stat Missen beuolhen vnd ingethan, also das sie denselben dritteil des gerichtes, als wiet der in dem wichtbilde begriffen had vnd inmassen den die vorbenanten von Plauwen vnd ire vorfarn burggrauen zcu Missen innegehabt herbracht vnd des gebrucht haben, innehaben nuzzen gebruchen vnd vns ierlichen dauon zewelff schock Missener groschen der besten muncze allecziit vff die pfingstheiligen tage geben vnd die vnserm schosser daselbst zucziiten in vnser slos vnuerzogenlich antworten sollen, vnd vff das sie darinne dester mynner widerstands gewynnen, haben wir yn gegunnet vnd zcgestatet, das vnser lute in den husern vnter dem Slossberge vnd vff dem Jarmarekte wonhafftig yn ganz zusteen vnd mit dem gerichte gehorsam sin sollen, den wir auch ein solchs zu thune vestiglich bii vermydung vnser vngnaden hiemit gebieten. Doch so behalten wir vns hirinne solchen gewalt, das wir den itzvndgenanten dritteil des gerichtes mit sinen zugehorungen, welchs iars das wir wollen, widdervmb zcu vns nemen vnd den inmassen alsuor innehaben, des gebruchen vnd geniessen mogen. Alsdanne sollen vns die burgere solcher obgeschriben zewelff schock groschen nicht mehr schuldig noch pflichtig sin zugeben, alle geuerde hirinne vßgeslossen. Des zu rechter orkunde haben wir vnser insigel an disen brieff lassen hengen, der geben ist zcu Missen des dinstags in den pfingstheiligen tagen nach Cristi vnser herren geburt vierzehenhundert darnach in dem sechs vnd vierzigsten iaren.

Nach dem Orig. im Rathsarchiv zu Meissen mit dem wohlhaltenen Siegel an einem Pergamentstreifen. Schramm hist. Schauplatz merkw. Brücken. Urk. S. 49. — Märcker Burggr. Meissen S. 138 f. im Auszug.

No. 101. 1446. 24. Juli.

Anno domini millesimo CCCC XLVI^o dominica post Mariae Magdalenae hat mein herre herzog Friderich Hannsen von Klumen vnd sinen erben zcu rechtem gelihen einen frien hoff am berge vnd vnter dem slosse zcu Missen gelegen, der vorzeiten der von Schonberg